

編號 1 號

【簡單个幸福】徐姿華原作

打早，涼涼个微風並柔柔个天色，掀開間房个白紗窗簾，同正對甜甜个夢肚裡醒來个僵搵手；難得个放棄日，搵在眠床看日頭輕輕徒步、聽窗仔外背吱啲个鳥仔聲，時間也像恬恬頓腳了，啊！這靚靚个朝晨。

食過朝，想去遛啊盡久無看著个朋友。自家駛車仔，時間就在自家个手頭項，做得慢慢仔行、定定仔寮；經過鬧熱个莊頭，車仔慢慢仔幹入鄉道，來到苗栗个穀倉——灣裡。兩片路脣，金黃飽滿个穀稔<sup>1</sup>硬硬會對禾田洩出來；風吹來，一陣一陣歡喜个搵來搵去、領頭磬腰个金黃稻浪，實在還鬆爽。田脣企等兩個在該比手畫腳个阿伯，日頭晨來，笠簷底下晒啊烏刻刻仔个面項，單淨看著兩排雪白个牙齒，想來應該蓋滿意今年係好年冬啦！

幹過一個大彎，共樣係闊野野个禾田，直直透到山下；深深淺淺个黃合等青青个田脣、綠綠个大樹，像係天公爺个調色盤，也係這個豐收个季節正有个景色。該向有幾坵早都收核早冬禾，準備愛蒔大冬禾个禾田，田水清清清，同闊闊个藍天搭白雲，田

脣个樹仔同人家屋，明明明反映出來，就像框在田脣做个相框裡背个相片，實在還靚。這向堵好有一坵田正經在該割禾，紅色个割禾機在田項緊行緊割，三、四個人在脣項搵手，無閒泊杈；割禾機後背跔等歸陣个白鶴仔，有兜个頭磬磬仔絡食、有兜个大步行等尋食、有兜个飛高飛低搶食，一等鬧熱，這就係禾田項最有生命力个畫面啦！

車仔慢慢仔駛入莊頭，伏在路脣个老狗牯看著車仔來，伸懶筋企起來拂尾，像迎接老朋友樣仔。一個著花衫个伯姆跔在屋頭前个菜園摘菜，菜園分屋仔抵等、日頭毋曾晒著，青柳柳个菜葉面項還有露水，看起來蓋萎頭、蓋錫人食个樣仔。兩個國小年紀个細佬仔，一個定定仔踏等自轉車，一個半行半走，手項還拗等籃球，嘻嘻哈哈有講有噓愛共下去打球仔。這一路个光景，實在分人心情爽快。

主人家款好一桌點心、番豆同瓜子，還有清香个高山烏龍茶，三、四個蓋久無見面个老朋友，天南地北講去毋知天合地。茶香、情醜，靚靚个日仔、靚靚个心情，這就係簡單个幸福。

<sup>1</sup> 穀稔：音 gūg` can；稻穗。